

大般若波羅蜜多經卷第四百四十八

唐三藏法師玄奘奉 詔譯

第二分眞如品第五十二之三

爾時世尊讚具壽善現言。善哉善哉。汝今能爲諸菩薩摩訶薩善說法要。汝之所說皆是如來威神之力。非汝自能善現。若菩薩摩訶薩於法眞如不可得相。深生信解。知一切法無差別相。聞說如是諸法眞如。不可得相。其心不驚。不恐。不怖。不疑。不悔。不退。不沒。是菩薩摩訶薩速能成辦所求無上正等菩提。具壽舍利子。白佛言。世尊。若菩薩摩訶薩成就此法。速能

成辦。所求無上正等覺耶。爾時佛告舍利子言。如是如是。如汝所說。若菩薩摩訶薩成就此法。速能成辦。所求無上正等菩提。具壽善現復白佛言。若菩薩摩訶薩欲疾成辦。所求無上正等菩提。當於何住。應云何住。佛告善現。若菩薩摩訶薩欲疾成辦。所求無上正等菩提。當於一切有情。住平等心。不應住不平等心。當於一切有情。起平等心。不應起不平等心。當於一切有情。以平等心與語。不應以不平等心與語。當於一切有情。起大慈心。不應起瞋恚心。當於一切有情。以大慈心與語。不應以瞋恚心與語。當於一切有

情起大悲心。不應起惱害心。當於一切有情。以大悲心與語。不應以惱害心與語。當於一切有情。起大喜心。不應起嫉妬心。當於一切有情。以大喜心與語。不應以嫉妬心與語。當於一切有情。起大捨心。不應起偏黨心。當於一切有情。以大捨心與語。不應以偏黨心與語。當於一切有情。起謙下心。不應起憍慢心。當於一切有情。以謙下心與語。不應以憍慢心與語。當於一切有情。起質直心。不應起諂詐心。當於一切有情。以質直心與語。不應以諂詐心與語。當於一切有情。起調柔心。不應起剛強心。當於一切有情。以調柔

心與語。不應以剛強心與語。當於一切有情起利益心。不應起不利益心。當於一切有情以利益心與語。不應以不利益心與語。當於一切有情起安樂心。不應起不安樂心。當於一切有情以安樂心與語。不應以不安樂心與語。當於一切有情起無礙心。不應起有礙心。當於一切有情以無礙心與語。不應以有礙心與語。當於一切有情起如父母。如兄弟。如姊妹。如男女。如親族心。亦以此心應與其語。當於一切有情起朋友心。亦以此心應與其語。當於一切有情起如親教師。如軌範師。如弟子。如同學心。亦以此心應與

其語當於一切有情起如預流一來不還阿羅漢獨覺菩薩摩訶薩如來應正等覺心亦以此心應與其語當於一切有情起應供養恭敬尊重讚歎心亦以此心應與其語當於一切有情起應救濟憐愍覆護心亦以此心應與其語當於一切有情起畢竟空無所有不可得心亦以此心應與其語當於一切有情起空無相無願心亦以此心應與其語復次善現若菩薩摩訶薩欲疾成辦所求無上正等菩提應自離害生命亦勸他離害生命恆正稱揚離害生命法歡喜讚歎離害生命者乃至應自離邪見亦勸他離邪

見恆正稱揚離邪見法。歡喜讚歎離邪見者。應自修四靜慮。亦勸他修四靜慮。恆正稱揚修四靜慮法。歡喜讚歎修四靜慮者。應自修四無量。亦勸他修四無量。恆正稱揚修四無量法。歡喜讚歎修四無量者。應自修四無色定。亦勸他修四無色定。恆正稱揚修四無色定法。歡喜讚歎修四無色定者。應自圓滿六波羅蜜多。亦勸他圓滿六波羅蜜多。恆正稱揚圓滿六波羅蜜多法。歡喜讚歎圓滿六波羅蜜多者。應自住十八空。亦勸他住十八空。恆正稱揚住十八空法。歡喜讚歎住十八空者。應自住眞如法界法性。不虛妄。

性。不變異性。平等性。離生性。法定。法住。實際。虛空界。不思議界。亦勸他住眞如。乃至不思議界。恆正稱揚。住眞如。乃至不思議界法。歡喜讚歎。住眞如。乃至不思議界者。應自住四聖諦。亦勸他住四聖諦。恆正稱揚。住四聖諦法。歡喜讚歎。住四聖諦者。應自修三十七菩提分法。亦勸他修三十七菩提分法。恆正稱揚。修三十七菩提分法。歡喜讚歎。修三十七菩提分法者。應自修三解脫門。亦勸他修三解脫門。恆正稱揚。修三解脫門法。歡喜讚歎。修三解脫門者。應自修八解脫。八勝處。九次第定。十遍處。亦勸他修八解脫。



八勝處。九次第定。十遍處。恆正稱揚修八解脫。八勝處。九次第定。十遍處法。歡喜讚歎修八解脫。八勝處。九次第定。十遍處者。應自圓滿菩薩十地。亦勸他圓滿菩薩十地。恆正稱揚圓滿菩薩十地法。歡喜讚歎圓滿菩薩十地者。應自圓滿五眼六神通。亦勸他圓滿五眼六神通。恆正稱揚圓滿五眼六神通法。歡喜讚歎圓滿五眼六神通者。應自圓滿陀羅尼門三摩地門。亦勸他圓滿陀羅尼門三摩地門。恆正稱揚圓滿陀羅尼門三摩地門法。歡喜讚歎圓滿陀羅尼門三摩地門者。應自圓滿如來十力。乃至十八不共。



法亦勸他圓滿如來十力。乃至十八佛不共法。恆正稱揚圓滿如來十力。乃至十八佛不共法。歡喜讚歎圓滿如來十力。乃至十八佛不共法者。應自圓滿三十二大士相八十隨好。亦勸他圓滿三十二大士相八十隨好。恆正稱揚圓滿三十二大士相八十隨好法。歡喜讚歎圓滿三十二大士相八十隨好者。應自圓滿無忘失法。恆住捨性。亦勸他圓滿無忘失法。恆住捨性法。歡喜讚歎圓滿無忘失法。恆住捨性者。應自順逆觀十二支緣起。亦勸他順逆觀十二支緣起。恆正稱揚順

逆觀十二支緣起法。歡喜讚歎順逆觀十二支緣起者。應自知苦斷集證滅修道。亦勸他知苦斷集證滅修道。恆正稱揚知苦斷集證滅修道法。歡喜讚歎知苦斷集證滅修道者。應自起證預流果智。而不證實際得預流果。亦勸他起證預流果智。及證實際得預流果。恆正稱揚起證預流果智。及證實際得預流果法。歡喜讚歎起證預流果智。及證實際得預流果者。應自起證一來不還阿羅漢果獨覺菩提智。而不證實際得一來不還阿羅漢果獨覺菩提。亦勸他起證一來不還阿羅漢果獨覺菩提智。及證實際得一來

不還阿羅漢果獨覺菩提。恆正稱揚起證一來。不還阿羅漢果獨覺菩提智。及證實際。得一來不還阿羅漢果獨覺菩提法。歡喜讚歎起證一來。不還阿羅漢果獨覺菩提智。及證實際。得一來不還阿羅漢果獨覺菩提者。應自入菩薩正性離生位。亦勸他入菩薩正性離生位。恆正稱揚入菩薩正性離生位法。歡喜讚歎入菩薩正性離生位者。應自嚴淨佛土成熟有情。亦勸他嚴淨佛土成熟有情。恆正稱揚嚴淨佛土成熟有情法。歡喜讚歎嚴淨佛土成熟有情者。應自起菩薩神通。亦勸他起菩薩神通。恆正稱揚起菩薩

神通法。歡喜讚歎起菩薩神通者。應自起一切智道。相智一切相智。亦勸他起一切智道相智一切相智。恆正稱揚起一切智道相智一切相智法。歡喜讚歎起一切智道相智一切相智者。應自斷一切煩惱習氣相續。亦勸他斷一切煩惱習氣相續。恆正稱揚斷一切煩惱習氣相續法。歡喜讚歎斷一切煩惱習氣相續者。應自攝受圓滿壽量。亦勸他攝受圓滿壽量。恆正稱揚攝受圓滿壽量法。歡喜讚歎攝受圓滿壽量者。應自轉法輪。亦勸他轉法輪。恆正稱揚轉法輪法。歡喜讚歎轉法輪者。應自攝護正法令住。亦勸他

攝護正法令住。恆正稱揚攝護正法令住法。歡喜讚歎攝護正法令住者。善現。若菩薩摩訶薩。欲疾成辦所求無上正等菩提。於如是法。以無所得而爲方便。應如是住。善現。諸菩薩摩訶薩。應如是學。甚深般若波羅蜜。多方便善巧。若如是學。乃能安住所應住法。若如是學。如是安住。則於色得無障礙。於受想行識得無障礙。乃至於轉法輪得無障礙。於正法住得無障礙。所以者何。善現。是菩薩摩訶薩。從前際來。不攝受色。不攝受受。想行識。乃至不攝受轉法輪。不攝受正法住。何以故。善現。色不可攝受。故。若色不可攝受。

則非色。受想行識不可攝受故。若受想行識不可攝受。則非受想行識。乃至轉法輪不可攝受故。若轉法輪不可攝受。則非轉法輪。正法住不可攝受故。若正法住不可攝受。則非正法住。說是菩薩所住法時。二千菩薩得無生忍。

第二分不退轉品第五十三

爾時具壽善現復白佛言。世尊。我等當以何行狀相。知是不退轉菩薩摩訶薩。佛告善現。若菩薩摩訶薩。能如實知諸異生地。諸聲聞地。諸獨覺地。諸菩薩地。諸如來地。如是諸地。諸說有異。而於諸法真如理中。

無變異。無分別。皆無二無二分。是菩薩摩訶薩。雖實悟入諸法眞如。而於眞如無所分別。以無所得爲方便故。是菩薩摩訶薩。既實悟入諸法眞如。雖聞眞如與一切法。無二無別。而無滯礙。所以者何。眞如與法不可說一。不可說異。不可說俱及不俱故。法界乃至不思議界。亦復如是。是菩薩摩訶薩。終不率爾而發語言。諸有所說。皆引義利。若無義利。終不發言。是菩薩摩訶薩。終不觀他好惡長短。平等憐愍而爲說法。是菩薩摩訶薩。不觀法師種性好惡。唯求所說微妙法義。善現不退轉菩薩摩訶薩。具如是等諸行狀相。



應以如是諸行狀相。知是不退轉菩薩摩訶薩。爾時  
善現復白佛言。何等名爲諸行狀相。佛言。善現。諸法  
無行。無狀。無相。當知是爲諸行狀相。具壽善現。復白  
佛言。若一切法無行狀相。是菩薩摩訶薩。於何轉故。  
名不退轉。佛言。善現。是菩薩摩訶薩。於色轉故。名不  
退轉。於受想行識轉故。名不退轉。於眼處轉故。名不  
退轉。於耳鼻舌身意處轉故。名不退轉。於色處轉故。  
名不退轉。於聲香味觸法處轉故。名不退轉。於眼界  
轉故。名不退轉。於耳鼻舌身意界轉故。名不退轉。於  
色界轉故。名不退轉。於聲香味觸法界轉故。名不退

轉。於眼識界轉故。名不退轉。於耳鼻舌身意識界轉故。名不退轉。於眼觸轉故。名不退轉。於耳鼻舌身意觸轉故。名不退轉。於眼觸爲緣所生諸受轉故。名不退轉。於耳鼻舌身意觸爲緣所生諸受轉故。名不退轉。於布施波羅蜜多轉故。名不退轉。於淨戒安忍精進靜慮般若波羅蜜多轉故。名不退轉。於內空轉故。名不退轉。於外空乃至無性自性空轉故。名不退轉。於眞如轉故。名不退轉。於法界乃至不思議界轉故。名不退轉。於苦聖諦轉故。名不退轉。於集滅道聖諦轉故。名不退轉。於四念住轉故。名不退轉。乃至於八

聖道支轉故。名不退轉。於四靜慮轉故。名不退轉。於四無量四無色定轉故。名不退轉。於八解脫轉故。名不退轉。於八勝處九次第定十遍處轉故。名不退轉。於空解脫門轉故。名不退轉。於無相無願解脫門轉故。名不退轉。於三乘十地轉故。名不退轉。於三摩地門轉故。名不退轉。於五眼轉故。名不退轉。於六神通轉故。名不退轉。於佛十力轉故。名不退轉。乃至於十八佛不共法轉故。名不退轉。於三十二大士相轉故。名不退轉。於八十隨好轉故。名不退轉。於無忘

失法轉故名不退轉。於恆住捨性轉故名不退轉。於一切智轉故名不退轉。於道相智一切相智轉故名不退轉。於異生地轉故名不退轉。於聲聞地獨覺地菩薩地如來地轉故名不退轉。於一切菩薩摩訶薩行轉故名不退轉。於諸佛無上正等菩提轉故名不退轉。何以故。善現。色自性無所有。受想行識自性無所有。如是乃至一切菩薩摩訶薩行自性無所有。諸佛無上正等菩提自性無所有。是菩薩摩訶薩。於中不住。故名爲轉。由不轉故。說名不退轉菩薩摩訶薩。若菩薩摩訶薩。能如是知。是名不退轉菩薩摩訶薩。

復次善現。一切不退轉菩薩摩訶薩。終不樂觀外道沙門婆羅門等形相言說。彼諸沙門婆羅門等。於所知法。實知實見。或能施設正見法門。無有是處。復次善現。一切不退轉菩薩摩訶薩。於佛善說法毗奈耶。不生疑惑。於世閒事無戒禁取。不墮惡見。不執世俗諸吉祥事。以爲清淨。終不禮敬諸餘天神。如諸世閒外道所事。決定不以種種花鬘塗散等香衣服瓔珞。寶幢幡蓋。妓樂燈明。供養天神及諸外道。善現。若菩薩摩訶薩。成就如是諸行狀相。知是不退轉菩薩摩訶薩。復次善現。一切不退轉菩薩摩訶薩。不墮地獄。

傍生鬼界阿素洛中。亦不生於卑賤種族。謂旃荼羅補羯娑等。亦終不受扇搗半擇無形二形及女人身。亦復不受盲聾瘖瘂癱癩矬陋等身。亦終不生無暇時處。善現。若菩薩摩訶薩。成就如是諸行狀相。知是不退轉菩薩摩訶薩。復次善現。一切不退轉菩薩摩訶薩。常樂受行十善業道。自離害生命。亦勸他離害生命。恆正稱揚離害生命法。歡喜讚歎離害生命者。乃至自離邪見。亦勸他離邪見。恆正稱揚離邪見法。歡喜讚歎離邪見者。是菩薩摩訶薩。乃至夢中亦不現起十惡業道。況在覺時。善現。若菩薩摩訶薩。

成就如是諸行狀相。知是不退轉菩薩摩訶薩。復次善現。一切不退轉菩薩摩訶薩。普爲饒益一切有情。以無所得而爲方便。恆修布施乃至般若波羅蜜多。常無閒斷。善現。若菩薩摩訶薩。成就如是諸行狀相。知是不退轉菩薩摩訶薩。復次善現。一切不退轉菩薩摩訶薩。諸所受持。思惟讀誦。契經應頌。記別諷頌。自說緣起。本事本生。方廣希法。譬喻論議。一切皆令究竟通利。以如是法。常樂布施一切有情。恆作是念。云何當令諸有情類。求正法願。皆得滿足。以無所得而爲方便。復持如是法。施善根。與諸有情平等共有。



迴向無上正等菩提。善現。若菩薩摩訶薩。成就如是  
諸行狀相。知是不退轉菩薩摩訶薩。復次善現。一切  
不退轉菩薩摩訶薩。於佛所說甚深法門。終不生於  
疑惑猶豫。何以故。善現。是菩薩摩訶薩。不見有法若  
色若受想行識。可於其中疑惑猶豫。如是乃至不見  
有法。若一切菩薩摩訶薩行。若諸佛無上正等菩提。  
可於其中疑惑猶豫。善現。若菩薩摩訶薩。成就如是  
諸行狀相。知是不退轉菩薩摩訶薩。復次善現。一切  
不退轉菩薩摩訶薩。成就調柔身語意業。於諸有情  
心無罣礙。恆常成就慈悲喜捨等起。相應身語意業。

決定不與五蓋共居。所謂貪欲瞋恚昏沈睡眠掉舉。惡作疑蓋。一切隨眠。皆已摧伏。一切結縛隨煩惱纏。皆永不起。入出往來。心不迷謬。恆時安住正念正知。進止威儀。行住坐臥。舉足下足。亦復如是。諸所遊履。必觀其地。安庠繫念。直視而行。運動語言。曾無卒暴。善現。若菩薩摩訶薩。成就如是諸行狀相。知是不退轉菩薩摩訶薩。復次善現。一切不退轉菩薩摩訶薩。諸所受用臥具衣服。皆常香潔。無諸臭穢。亦無垢膩。蟣蝨等蟲。心樂清華。身無疾病。善現。若菩薩摩訶薩。成就如是諸行狀相。知是不退轉菩薩摩訶薩。復次

善現。一切不退轉菩薩摩訶薩。身心清淨。非如常人  
身中。恆爲八萬戶蟲之所侵食。何以故。是諸菩薩。善  
根增上。出過世間。所受身心。內外清淨。故無蟲類侵  
食其身。如如善根。漸漸增益。如是如是。身心轉淨。由  
此因緣。是諸菩薩。身心堅固。逾於金剛。不爲違緣之  
所侵惱。所謂寒熱飢渴蚊蟲風日毒蟲刀杖等類。及  
諸纏結。不能侵惱。善現。若菩薩摩訶薩。成就如是諸  
行狀相。知是不退轉菩薩摩訶薩。爾時具壽善現白  
佛言。世尊。如是不退轉菩薩摩訶薩。云何常得身語  
意淨。佛告善現。是菩薩摩訶薩。如如善根。漸漸增長。

如是如是。身語意淨。由善根力所除遣故。窮未來際。畢竟不起。由此常得身語意淨。復次善現。是菩薩摩訶薩。身三語四意三妙行。常現在前。故一切時身語意淨。由此淨故。超過聲聞及獨覺地。已入菩薩正性離生。不證實際。常樂成熟。一切有情嚴淨佛土。由斯常得身語意淨。住菩薩位。堅固不動。善現。若菩薩摩訶薩。成就如是諸行狀相。知是不退轉菩薩摩訶薩。復次善現。一切不退轉菩薩摩訶薩。不重利養。不徇名譽。於諸飲食衣服臥具。房舍資財。皆不貪染。雖受十二杜多功德。而於其中都無所恃。畢竟不起慳貪。

破戒。忿恚懈怠。散亂愚癡。及餘種種煩惱纏結相應之心。善現。若菩薩摩訶薩。成就如是諸行狀相。知是不退轉菩薩摩訶薩。復次善現。一切不退轉菩薩摩訶薩。覺慧堅猛。能深悟入。聽聞正法。恭敬信受。繫念思惟。究竟理趣。隨所聽聞。世出世法。皆能方便會入。般若波羅蜜多。甚深理趣。諸所造作。世間事業。亦依般若波羅蜜多。會入法性。不見一事。出法性者。設有不與法性相應。亦能方便會入。般若波羅蜜多。甚深理趣。由此不見出法性者。善現。若菩薩摩訶薩。成就如是諸行狀相。知是不退轉菩薩摩訶薩。復次善現。

一切不退轉菩薩摩訶薩。設有惡魔現前。化作八大  
地獄。復於一一大地獄中。化作無量無邊菩薩。皆被  
猛燄交徹燒然。各受辛酸楚毒大苦。作是化已。語不  
退轉諸菩薩言。此諸菩薩。皆受無上正等菩提不退  
轉記。故墮如是大地獄中。恆受如斯種種劇苦。汝等  
菩薩。既受無上正等菩提不退轉記。亦當墮此大地  
獄中。受諸劇苦。佛授汝等大地獄中受極苦記。非授  
無上正等菩提不退轉記。是故汝等。應速棄捨大菩  
提心。可得免脫大地獄苦。生於天上。或生人中。受諸  
富樂。是時不退轉菩薩摩訶薩。見聞此事。其心不動。

亦不驚疑。但作是念。受不退轉記菩薩摩訶薩。若墮地獄。傍生。鬼界。阿素洛中。必無是處。所以者何。不退轉位菩薩。定無不善業故。亦無善業招苦果故。諸佛定無虛誑語故。如來所說。皆爲利樂一切有情。大慈悲心所流出故。所見聞者。定是惡魔所作所說。善現。若菩薩摩訶薩。成就如是諸行狀相。知是不退轉菩薩摩訶薩。復次善現。一切不退轉菩薩摩訶薩。設有惡魔作沙門像。來至其所。說如是言。汝先所聞。應修布施波羅蜜多。令速圓滿。應修淨戒安忍精進靜慮般若波羅蜜多。令速圓滿。如是乃至應證無上正等。



菩提。如是所聞。皆爲邪說。應速棄捨。勿謂爲眞。又汝先聞。應於過去未來現在一切如來。應正等覺。及諸弟子。從初發心。乃至法住。其中所有功德善根。皆生隨喜。一切合集。與諸有情平等共有。迴求無上正等菩提。如是所聞。亦爲邪說。應速棄捨。勿謂爲眞。若汝捨彼所說邪法。我當教汝眞實佛法。令汝修學。疾證無上正等菩提。汝先所聞。非眞佛語。是文頌者。虛妄撰集。我之所說。是眞佛語。令汝速證。所求無上正等菩提。善現。若菩薩摩訶薩。聞如是語。心動驚疑。當知未受不退轉記。彼於無上正等菩提。猶未決定。未名

不退轉菩薩摩訶薩。善現。若菩薩摩訶薩。聞如是語。其心不動。亦不驚疑。但隨無作無相無生法性而住。是菩薩摩訶薩。諸有所作。不信他語。不隨他教而修。布施波羅蜜多。不隨他教而修淨戒安忍精進靜慮。般若波羅蜜多。乃至不隨他教而趣無上正等菩提。當知如是菩薩摩訶薩。已於無上正等菩提。得不退轉。善現。如漏盡阿羅漢。諸有所爲。不信他語。現證法性。無惑無疑。一切惡魔。不能傾動。如是不退轉菩薩摩訶薩。一切聲聞獨覺外道諸惡魔等。不能破壞。折伏其心。令於菩提而生退屈。善現。是菩薩摩訶薩。決

定已住不退轉地。所有事業。皆自審思。非但信他而便起作。乃至如來應正等覺。所有言教。尚不輕爾信受奉行。況信聲聞獨覺外道惡魔等語。而有所作。是諸菩薩。諸有所爲。但信他行。終無是處。何以故。善現。是菩薩摩訶薩。不見有法。可信行者。所以者何。善現。是諸菩薩。不見有色。可信行者。不見有受。想行。識。可信行者。亦不見有色。真如。可信行者。不見有受。想行。識。真如。可信行者。如是乃至不見有諸佛。無上正等菩提。真如。可信行者。亦不見有諸佛。無上正等菩提。真如。可信行者。善現。若菩薩摩訶薩。成就如是諸行狀相。

知是不退轉菩薩摩訶薩。復次善現。一切不退轉菩薩摩訶薩。設有惡魔作苾芻像。來詣其所。唱如是言。汝等所行。是生死法。非菩薩行。非由此得一切智智。汝等今應修盡苦道。速盡眾苦。證般涅槃。是時惡魔。卽爲菩薩說墮生死相似道法。所謂骨想。或青瘀想。或膿爛想。或臃脹想。或蟲食想。或異赤想。或慈或悲。或喜或捨。或四靜慮。或四無色。告菩薩言。此是真道。眞行。汝用此道。此行當得預流果。乃至當得獨覺菩提。汝由此道。由此行故。速盡一切生老病死。何用久受生死苦爲。現在苦身。尙應厭捨。況更求受當來苦。

身宜自審思。捨先所信。善現。是菩薩摩訶薩。聞彼語時。其心不動。亦不驚疑。但作是念。今此苾芻。益我不少。能爲我說相似道法。令我識知此道。不能證預流果。乃至不證獨覺菩提。況當能證所求無上正等菩提。是菩薩摩訶薩。作此念已。深生歡喜。復作是念。今此苾芻。甚爲益我方便。爲我說障道法。令我識知障道法已。於三乘道自在修學。善現。時彼惡魔。知此菩薩深生歡喜。復作是言。咄哉男子。汝今欲見諸菩薩摩訶薩。長時勤行無益行不。謂諸菩薩摩訶薩眾。經如殞伽沙數大劫。以無量種上妙衣服飲食臥具。醫

藥資財花香等物。供養恭敬。尊重讚歎。旃伽沙等諸佛世尊。復於旃伽沙等佛所。修行布施。波羅蜜多。修行淨戒。安忍精進。靜慮般若。波羅蜜多。乃至旃伽沙等佛所。修一切智。修道相智。一切相智。是諸菩薩摩訶薩眾。亦親近承事。如旃伽沙佛。於諸佛所。請問無上正等覺道。謂作是言。云何菩薩摩訶薩。安住無上正等覺道。云何菩薩摩訶薩。修行布施。乃至般若。波羅蜜多。安住內空。乃至無性自性空。安住眞如。乃至不思議界。安住苦集滅道聖諦。修四念住。乃至八聖道支。修四靜慮。四無量。四無色定。修八解脫。乃至十

遍處。修空無相無願解脫門。修極喜地乃至法雲地。修五眼六神通。修佛十力乃至十八不共法。修三十二大士相八十隨好。修無忘失法恆住捨性。修陀羅尼門三摩地門。修順逆觀十二支緣起。嚴淨佛土。成熟有情。修諸菩薩殊勝神通。修圓滿壽量。學轉大法輪。護持正法。令得久住。修一切智道相智一切相智。殑伽沙等諸佛世尊如所請問。次第爲說。是諸菩薩摩訶薩衆。如佛教誨。安住修學。經無量劫。熾然精進。尙不能證所求無上正等菩提。況今汝等所修所學。能證無上正等菩提善現。是菩薩摩訶薩。雖聞其



言。而心無異。不驚。不恐。無疑。無惑。倍復歡喜。作是念言。今此苾芻。極多益我方便。爲我說障道法。令我知此障道之法。決定不能證預流果。乃至不證獨覺菩提。況能證得所求無上正等菩提。善現時。彼惡魔。知此菩薩心不退屈。無惑無疑。卽於是處。化作無量苾芻形像。語菩薩言。此諸苾芻。皆於過去。勤求無上正等菩提。經無量劫。修行種種難行苦行。而不能得所求無上正等菩提。今皆退證阿羅漢果。諸漏已盡。至苦邊際。云何汝等能證無上正等菩提。善現。是菩薩摩訶薩。見聞此已。卽作是念。定爲惡魔化作如此苾

芻形像。擾亂我心。因說障礙相似道法。必無菩薩摩訶薩眾。修行般若波羅蜜多。至圓滿位。不證無上正等菩提。退墮聲聞。或獨覺地。爾時菩薩復作是念。若菩薩摩訶薩。修行布施。乃至般若波羅蜜多。至圓滿位。不證無上正等菩提。必無是處。乃至修行一切智道。相智一切相智。至圓滿位。不證無上正等菩提。必無是處。善現。若菩薩摩訶薩。成就如是諸行狀相。知是不退轉菩薩摩訶薩。復次善現。一切不退轉菩薩摩訶薩。恆作是念。若菩薩摩訶薩。如諸佛教。精勤修學。常不遠離。布施淨戒。安忍精進。靜慮般若波羅蜜

多所攝妙行相應作意。常不遠離一切智智相應作意。常以方便勸諸有情。精勤修學。布施淨戒。安忍精進。靜慮般若。波羅蜜多。是菩薩摩訶薩。決定不退六波羅蜜多。乃至決定不退一切相智。必證無上正等菩提。善現。若菩薩摩訶薩。成就如是諸行狀相。知是不退轉菩薩摩訶薩。復次善現。一切不退轉菩薩摩訶薩。恆作是念。若菩薩摩訶薩。覺知魔事。不隨魔事。覺知惡友。不隨惡友語。覺知境界。不隨境界轉。是菩薩摩訶薩。決定不退六波羅蜜多。乃至決定不退一切相智。必證無上正等菩提。善現。若菩薩摩訶薩。成

就如。是諸行狀相。知是不退轉菩薩摩訶薩。復次善現。一切不退轉菩薩摩訶薩。聞佛世尊所說法要。深心歡喜。恭敬信受。善解義趣。其心堅固。踰於金剛。不可動轉。不可引奪。常勤修學。六波羅蜜多。心無厭倦。亦勸他學。六波羅蜜多。心無厭倦。善現。若菩薩摩訶薩。成就如是諸行狀相。知是不退轉菩薩摩訶薩。

大般若波羅蜜多經卷第四百四十八

音釋

軌範

軌俱水切。範音犯。謂軌則範模也。

補羯娑

梵語也。此謂昇死屍等之賤類也。羯

居謁切

扇搆

梵語也。此云生謂天然生者。男根不滿也。搆勅皆切。

半擇

梵語具云半擇

迦此云變謂  
今生變作也  
**孽** 孽閭員切  
**躄** 躄亦切  
足不能行也  
**癩** 癩音

顛癩音閉  
狂病也  
**矧** 矧昨禾切  
陋也  
**陋** 陋音  
覺時 覺音  
睡醒也 教音  
**惛**

**沈** 沈音  
惛也  
**掉舉** 掉徒弔切  
搖也  
舉居許切  
**迷** 迷音  
謬

幼切謂迷  
惑謬誤也  
**蟻** 蟻居豈切  
音瑟  
**徇** 徇松閭切  
求也  
**杜** 杜音  
多也 梵語

云頭陀此云修治  
謂修治淨行也  
**辛** 辛音  
酸 酸蘇官切  
寒酸也  
**劇** 劇音  
苦 劇竭

甚也  
**撰** 撰音  
述也  
**青** 青音  
瘀 瘀依據切  
青瘀謂  
**膿** 膿音  
爛 膿奴冬

也爛郎肝  
切糜爛也  
**腫** 腫音  
脹 腫正絳切  
脹知亮  
切腫臭脹滿也

大般若波羅蜜多經卷四十四

四十二

五八